

www.BibleForChildren.org


Mateu 1




Elizaveta ou a mu pitire maonda o mutanu na thzofoci, Nyambi wa tumine kangeru Gaburiele mu diumbo dyo mu Galilea edi di nethsiwa Nazareta, kwa diungu oyu a ungekerire mukwerume o dithzina dyo Josefa, o mu mukuta wa Fumu Davida. Dithzina dyoyo diungu po Madiya.



Unone kangeru ka mu amberire ci:
"Wa yapa Madiya, inene o na
tambura thsihemo kwa Nyambi.
Kenge wa ku
thza poremu no kwereka
mwana o mukwerumeana,
wa ku mu te dithzina dyo
Yesu. Kenge a
kwikara o mukuru, karo
kenge a kwithsiwa Mwana
Nyambi, aye o Kuthzinama Nene."



“Fumu Nyambi kenge a ku
mu pa ofumu o kuninga eci wa
mukwathsañuru wenthzi Davida.
Kenge mba a tumina mukuta wa
Jakovo myaka thzothzihe,
karo kutumina kwenthzi
kenge mba kwikara ko
diyere.”



Madiya wepurire kangeru ci: "Eyo ne ngepi ya ku dikara? Ame po no diungu." Kangeru ka tawire ci: "Mupepo Oukenu kenge wa ku shurumukera pa poe, okoro wa Nyambi, aye o Kuthzinama Nene, kenge wa ku ku thsika. Mweyo, oyu mwanuke o mukenu oyu wa kwerekiwa kenge a kwithsiwa Mwana Nyambi."



Mwao mayuwa Madiya wa ciroithserire no ku yakama ku thza ku ditunga dyo mikinya mu diumbo dyo mu Judea. Wa kengenine mu nthzio thza Zakariya no ku vumenena Elizaveta. Elizaveta ou a yuvire oku kuvumenena kwa Madiya, mwanenthzi mu dira dyenthzi wa reaire.



Elizaveta wa yarire Mupepo Oukenu no ku tumuka ku amba ci: "O mukwa thsiyauthzi owe mu kaci kambuyama wahe! Wa thsiyauthzi oyu mwana wa kwereka."



Kwerekwiwa kwa Yesu Krisitu
kwekarire kenge: Mama
wenthzi Madiya shime a
ungekeriwire kwa
mukwerume o dithzina dyo
Josefa. Uno honi o kwa
shime ku ciyeka,
kwa wanaharire ci
Madiya wekarire
poremu kokoro o
Mupepo Oukenu.




Mweyo, pakuninga ci
munuwenthzi Josefa nedi
munu o muwawa, ka a fotire
ku mu fithsa honyi kwanu,
wa anekerire ku mu
rukurura ko kukana ku i
dimuka anu.




Unone o ku anekera eyo, kangeru ka Fumu ka hokokire ku kwenthzi ku turo no ku mu ambera ci: "Josefa mwana Davida, wa yapa ku shimba Madiya ci ekare munuwoe, inene eyi a na remenena po yaa tunda ku Mupepo Oukenu. Kenge a kwereka mukwerumeana, wangu wa ku mute dithzina dyo Yesu, inene kenge a ku yoyithsa anuenthzi kwivi yo."




Josefa ou a pindukire, wa tendire eyi ka mu raererire kangeru ka Fumu. Wa shimbire Madiya kwikara munuwenthzi. Uno honi ka a rarire nenthzi shime ku ka kuma pa kwerekiwa kwa mwanenthzi. Josefa wa mu tire dithzina dyo Yesu.



Mwao mayuwa kwa tundire thsiraerera kwa Sesare
Agusitu ci ku tariwe anu wahe awa a di mu matunga aa
a na endithsa. Anu wahe a
ka ciñorithsire munu no
munu, ku diumbo
dyo mukuta wa
tata wenthzi.



Mweyo, Josefa naye wa tundire ku Galilea mu diumbo
edi di nethsiwa Nazareta, ku thza ku Judea mu diumbo
dya Davida edi di
nethsiwa Betelehema,
inene naye wa mu
mukuta no
dihumo dya



Davida. Wa ka
ciñorithsire na Madiya
oyu a ungekerire. Madiya wekarire poremu.



O kwa di mu Betelehema
thsikati thsenthzi thso ku
shamuruka thsa kumine.



Wa shamurukire mwedi wenthzi o mukwerumeana. Wa mu vungerire peto yombu no ku mu rangeka mu thsikungu, mukaci ko kuninga ci ka wanine maturero mu nthzio thzenda.



Omo mu ndau kwekarire adithsani po pepi awa a hungererire mitanga thzo othsiku. Kangeru ka Fumu ka hokokire kukwo, kutethzima kwa

Fumu kwa wa pakire mu kaci.

Adithsani a cishutukire no ku yapa nene. ✨



Kangeru ka wa amberire ci: "Mwa yapa! Inene naa mi retera Muthzimbu Ouwa, ou wa ku retera thsinyanyu thsothsikuru anu wahe. Naa amba ci uno othsiku, mu diumbo

dya Davida mu nerekiwera muyoyithsi, Krisitu Fumu."




“Kenge mu ka mu dimuka ko thsimonithso ethsi, kenge mu ka wana kambu aka ka na vungeriwa mwito no ku rangekiwa mu thsikungu.”



Ko wanguwangu mungi o dikanga dyo mu wiru dyo
tungeru wa ciwanine no Kangeru ko
kutanga.



Twa shangarire Nyambi no ku amba ci: "Kutethzima kwikare kwa Nyambi mu diwiru, thsiyaro thsenthzi thsikare kwanu wahe mu kaye awa a



na mu roerithsa."




Tungeru ou twa wa thsiire ku huka ku wiru, adithsani a ningire ci: "Tu thzenu ku Betelehema tu ka mone eyi i na tendahara, eyi a na tu tongwera Fumu."



Adithsani a yakamenine ku Betelehema. A ka wanine a Madiya na Josefa no kambu aka ka na rangekiwa mu thsikungu. Ou a ka mu monine, a tongorire eyi ka wa tongwerire kangeru yoyu mwanuke.




Yesu shime
erekiwerire mu
mbongi ethzi thzi
nethsiwa
Betelehema,
mu ditunga



dya Judea, Heroda o ku di fumu.
Mwethso thsikati akwerume
owanyanyami o ku muvo
a keyire mu Yerusalema.






Epurire ci: "Kupi a di oyu kambu nerekiwa, oyu wa kwikara Fumu o Majuda? Tu na mono ditungwethzi dyenthzi o ku di va ku muvo, ngouno tu na di shupwera ku na mu pa direma."



Heroda ngou ethserire ku mukunda awo akwerume owanyanyami no ku wepwerikethza thsikati shemwa ethsi dya monaharire edyo ditungwethzi. Wa wa amberire ci: "Mu thze ku Betelehemu mu ka fotithsithse nawa yoyo mwanuke."



“Ou mwa ku ka mu wana
mwa ku na ni tongwere, ci
nga name na ku thze na
ku ka mu pe direma.”





Ou a manine ku yuva eyi a ambire fumu, awo akwerume
owanyanyami a shumunine ku thza. O kwa di
mu dikuñwa, ditungwethzi edi a monine
ku muvo dya wa tangererire ku
Betelehema no ku kemana
peuru thzo ndau apa
ekarire mwanuke.



Engenine mu nthzio no ku mona mwanuke na mama wenthzi Madiya. A tongamine ku manwi ku mu remeka,

a kwatire mwinyungero yo no ku shimbamo ekunda yo gauda, insense no mira eyi a mu shimberire. Pakuninga ci

Nyambi wa wa nomenithsire ku turo ci a ku huka kwa Heroda, a hukire ku ditunga dyo ko dikuñwa dyadyo.



Akwerume owanyanyami o ku muvo ou a thzire, kangeru ka Fumu ka hokokire kwa Josefa ku turo. Ka mu amberire ci: "O pinduke o shimbe mwanuke na mama wenthzi o cirere ku Egepita. Wa ku kekareko shime ou na ku ku tongwera karo ci o huke, inene

Heroda kenge a ku fotafota oyu mwanuke ci a mwipae."



Oo othsiku Josefa wa pindukire no ku shimba mwanuke na mama wenthzi ku thza ku Egepita. A kekarireko shime Heroda ou a fire. Eyi ya tendaharire ci i citombore neyi a ambire Fumu ka mukwakukethza yo kuninga ci:



“Na nithsa mwanange ku tunda mu Egepita.”





Heroda ou a monine ci a
mwangerire awo akwerume
owanyanyami, wa anthzipire
nene. Wa tumine mashwarare
ku Betelehema no muya mu
ditunga momuhe ku kepaa
anuke wahe



wakwerume o . . .



. . . myaka thzidi no ku huthsa
pashi, ku endererithsa thsikati
thsiya a yuvire kwakwerume
owanyanyami ethsi dya
monaharire ditungwethzi.






Heroda ou a fire, kangeru ka
Fumu ka hokokire kwa
Josefa ku turo mu Egepita.
Ka mu amberire ci: "O
pinduke, o shimbe mwanuke
na mama wenthzi o
huke ku ditunga dya
Isiraele, inene waya a
fotire ci epae

mwanuke na fu."



Unone Josefa ou a yuvire
ci Akelausi yodiyo na
a shwana tata wenthzi
Heroda kwikara fumu
mu Judea, wa
yapire ku



thzako. Unone
ou a mu nomenithsire Nyambi
ku turo, wa thzire mu thsikiriti thsa
Galilea.






Wa ka tungire mu
mbongi ethzi thzi nethsiwa
Nazareta. Eyi shime ya citomborire
neyi a ambire akwakukethza ci: "Kenge a
kwithsiwa ci MukwaNazareta."



Inene Nyambi wa shimine nene kaye
ku ninga ci mane wa ka pire Mwane
yofoci pakamutwa ci munu yomuhe o
ku tawa ku kwenthzi a ku nonga,
unone a ku wane mwoyo o
diyere.



36



60



AkwaRoma 3:23 inene anu wahe na tende thsivi, mweyo, wahe na kwanga ku kuma ku kutethzima kwa Nyambi.

AkwaRoma 6:23 Inene muyambo o thsivi po kufa, unone thsipa thso kengekenge thso thsihemo thsa Nyambi po mwoyo o diyere mwa Krisitu Yesu Fumu wetu.

Maheveru 9:27 Eci dyodi a na roera munu yomuhe ku fa muendo ofoci, munyima no ku mu ratura Nyambi,

AkwaEfese 2:8,9 Inene na mu yoyithsiwa ko thsihemo thsa Nyambi ko thsitawo. Oko kuyoyithsiwa kadi cingwa kwaa tunda ku kwenu, unone thsipa thsa Nyambi.

Kuyoyithsiwa po kadi cingwa kwaa tunda pekwama, mweyo, kwithsa oyu nga ku cishangarera.



AkwaRoma 10:9,10 Inene ngeci owepo citawera ko kanwa koe ci Yesu po Fumu, no ku tawa mu mucima woe ci Nyambi wa mu pindurire kwafu, kenge wa ku yoyithsiwa. Inene ko mucima munu aa tawa no ku tendiwa omuwawa, karo ko kanwa munu aa citawera no ku yoyithsiwa.

Johani 3:16,17 "Inene Nyambi wa shimine nene kaye ku ninga ci mane wa ka pire Mwane yofoci pakamutwa ci munu yomuhe o ku tawa ku kwenthzi a ku nonga, unone a ku wane mwoyo o diyere. Inene Nyambi kadi cingwa shime a tumine Mwane mu kaye ku na ka ratura, unone ci kaye nga ka yoyithsiwe kenthzi."



1 Johani 5:11-13 Ou odiyo ombangi ci Nyambi na a tu pa mwoyo o diyere, karo ou mwoyo po mwa Mwane u di. Oyu di na Mwana, o di no mwoyo; yomuhe oyu na piri Mwana Nyambi, ka a di no mwoyo. Naa mi ñorera eyi amwe mu na tawa mu dithzina dya Mwana Nyambi, ci nga mu dimuke ci mu di no mwoyo o diyere.



Mateu 1-2; Luka 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Mashi (NT (mho) ©2023 The Seed Company

<https://www.bible.com/bible/3749/MAT.1.MHO>

©2026 Bible for Children, Inc.

www.M1914.org

www.bibleforchildren.org

